

UNITED NATIONS DEVELOPMENT PROGRAMME (UNDP ka PROGRAMA NASOENS UNIDAS NIAN BA DEZENVOLVIMENTU)

Vizaun Jerál kona-ba Organizasaun no Aprosimasaun kona-ba Jéneru

United Nations Development Programme (UNDP) ne'e ajénsia boot liu Nasoens Unidas nian ne'ebé servisu iha Timor-Leste. Iha Timor-Leste nia iha eskritóriu ida iha UN House, Caicoli, Dili ne'ebé hahú iha 1999. UNDP servisu ho instituisaun governu, ajensia sira, organizasaun sosiedade sivil no comunidade. Nia objetivu aas liu mak atu promove no servisu hodi hetan dezenvolvimentu global iha Timor-Leste, atu hetan nia objetivu hirak ne'e nia serbisu tuir planu Governu Timor-Leste nian ba dezenvolvimentu nasionál.

Liu tiha faze destruisaun ne'ebé akontese iha 1999, hanesan ho ajénsia internasionál no ONG sira seluk, UNDP mos muda nia programa husi faze ajuda humanitarian ba modelu rekonstrusaun. UNDP nia prioridade agora mak atu promove dezenvolvimentu sustentável, ba perspetiva tempu naruk nian ne'ebé bazeia ba Timor-Leste nia kondisaun material. Organizasaun ne'e hametin ona nia área serbisu ne'ebé nia atu fó atensaun ba husi tinan 2003 to'o 2007 iha Timor-Leste, hanesan tuir mai ne'e: promove governasaun demokrátika, redusaun kiak no dezenvolvimentu komunitáriu, manajementu enérjia no meiu-ambiente, Objetivu Dezenvolvimentu Milénium nian, no HIV/SIDA.

Disparidade jéneru nian:

Feto iha Timor-Leste jeralmente iha estatutu ki'ik liu mane sira-nian. Maske Konstituisaun ko'alia kona-ba igualdade jéneru ninian, fetu no labarik-fetu sira sei terus ba diskriminasaun oioin iha umalalan, servisu-fatin no comunidade. Fetu iha liu probabilidade atu husik eskola duké mane, no katoluk rua husi fetu tinan 15-60 mak la hatene hakerek no lee, kompara ho mane ne'ebé besik metade. Fetu terus mós diskriminasaun iha servisu-fatin: sira-nia partisipasaun iha merkadu servisu formal ki'ik liu mane nian no sira simu pagamentu ki'ik liu mane sira husi servisu ne'ebé hanesan (PAP, 2003).

Fetu iha mós probabilidade atu simu ai-han uitoan liu mane sira. Katoluk ida husi fetu tinan 15-49 hetan malnutrisaun no moras esgotamentu króniku (UNICEF, 2003). Fetu barak mak laiha asesu ba informasaun no servisu kona-ba planeamentu familiar. Hanesan rezultadu, número fertilidade aas nafatin no fetu barak mate bainhira tuur-ahi – mate besik 800 husi tuur-ahi 100,000. Agora fetu iha asesu ba informasaun barak liu kona-ba saúde reprodutiva, maibé fatór kulturál sei satan nafatin sira-nia direitu ba saúde, liu-liu iha área rural sira.

Programa Nasoens Unidas nian ba Dezenvolvimentu, *Dalan atu sai husi Kiak: Dezenvolvimentu Rural Integradu – Relatóriu kona-ba Dezenvolvimentu Umanu iha Timor-Leste, 2006*, UNDP, Dili, Janeiro 2006, pp.15-16

UNDP nia objetivu kona-ba igualdade jéneru ne'e meta ikus nian ne'ebé nia konsidera adekuaudu no nesesáriu atu hetan dezenvolvimentu efetivu iha tempu naruk nia laran. UNDP ninia *Corporate Gender Strategy* trasa ajénsia ne'e ninia polítika kona-ba jéneru iha Timor-Leste, no trasa mós estratéjia sira ne'ebé nia fiar katak nesesáriu atu hetan objetivu ne'e. Organizasaun ne'e utiliza forma estratéjika hodi jeneraliza jéneru (gender mainstreaming) no fó kbiit ba fetu sira atu hetan igualdade jéneru ninian. Ba UNDP, jéneru nia jeneralizasaun signifika atu aseguara katak iha área hotu-hotu ne'ebé nia fó atensaun ba tenki konsidera jéneru nia impaktu ba fetu no mane sira, katak pesoál no parseiru sira iha kapasidade ne'ebé sira prezisa atu bele hetan igualdade jéneru ninian, no katak bainhira sira fó konsellu ba governu nia órgaun sira kona-ba polítika, sira tenki promove beibeik igualdade jéneru ninian.

UNDP dezenvolve mós parseria metin ho UNIFEM. Iha prátika, ne'e signifika katak UNIFEM sei dezeńã no implementa beibeik projetu pilotu atu buka fó apoiu ba emansipasaun fetu nian. Se ida-ne'e susesu, entaun UNDP bele fó asisténsia hodi halo boot tan projetu ne'e.

Programa

Projetu

Tanba UNDP iha projetu barak, selesaun ki'ik ne'ebe halo ba projetu sira ne'ebe involve jeneralizasaun jéneru nian hanesan tuir mai. Iha 2006, UNDP hala'o revizaun internu ida importante tebetebes ba projetu sira-ne'e, hodi buka hatene loloos se projetu hirak ne'e hetan duni sira-nia objetivu kona-ba igualdade jéneru. .

Governasaun Demokrátika – Parlamentu Nasionál: Harii Kapasidade iha Setór Parlamentár

Iha área Governasaun Demokrátika, UNDP fó apoiu ba kapasitasaun institucional ba Parlamentu Nasionál atu asegura katak órgaun ida-ne'e funsiona tuir Konstituisaun haruka. Hanesan parte projetu ne'e ninian, UNDP fó korajen ba representante fetu sira iha Parlamentu atu halo *workshop*, sesaun infomasaun no fahe esperiénsia. Atividade ne'e nia objetivu ida mak atu halo fetu sira laran-metin no iha kapasidade atu hala'o no defini sira-nia knaar iha Paralamentu, inklui reprezenta fetu nia lian maibé labele limita de'it ba ne'e.

Maske fetu nia proporsaun iha Parlamentu relativamente aas, sira sei hasoru dezafiu kona-ba sira-nia efisiénsia no poder. UNDP atribui dezafiu ne'e ba fatór lubun ida. Ne'e inklui divizaun entre partidu sira, ne'ebé hamenus possibilidade atu hetan unidade entre deputadu fetu no mane sira iha Parlamentu, fó liberdade uitoan de'it ba fetu sira atu apresenta sira-nia opiniaun, atu halo desizaun no atu hala'o knaar responsabilidade nian. Atu kombate dezafiu hirak ne'e, UNDP hanoin atu dezenvolve tan espasu iha partidu sira-nia liur ba fetu, laho mane. Nia buka mós atu hametin jeneralizasaun jéneru ninian iha parlamentu nia projetu hotu-hotu, duke limita tiha igualdade jéneru no lida ho fetu de'it.

Redusaun Kiak no Dezenvolvimentu Komunitáriu – Oecussi Ambeno Community Activation Project (OCAP)

Projetu ida-ne'e iha objetivu atu fó kbiit ba grupu komunitáriu sira iha Oecussi atu dezenvolve negósiu ki'ik sira, hanesan hakiak animal hodi faan ba Timor Osidental. Grupu lubun ida ne'ebé simu emprésta mikrokreditu husi UNDP envolve de'it fetu, no sira konsidera fetu hanesan grupu prinsipál ne'ebé atu hetan benifísiu ne'e. Dezafiu ida ne'ebé UNDP hasoru daudaun mak atu envolve liu tan fetu hanesan 'Fasilitadór ba Ativasaun Komunitária' (*'Community Activation Facilitators'*), pozisaun lideransa ne'ebé oras-ne'e mane sira mak domina.

Governasaun Demokrátika – Programa atu Hasa'e Fetu iha Area Rural nia Lideransa no Partisipasaun iha Prosesu Harii Nasaun Timor-Leste (PERWL)

UNDP halo servisu ho UNIFEM no parseiru sira seluk, hanesan GAPI, hodi hala'o projetu ne'e. Projetu ne'e buka atu fó asisténsia no motivasaun ba fetu sira atu partisipa hodi harii sistema sosiál, polítiku no legal ida foun iha Timor-Leste. Programa PERWL hateten katak sistema foun sira-ne'e halo atu haluan envolvimentu sosiál no hahii direitos umanus no mós

atu iha kbiit hodi responde ba jéneru nia nesesidade oin-oin. Projetu nia atividade sira inklui formasaun lideransa nian ba kandidatu fetu sira iha área rural no dezenvolve módu treinentu ninian kona-ba prátika lideransa transformativa.

Peskiza no Dadus Fahe Tuir Seksu

Hamutuk ho UNIFEM, órgaun sira governu ninian no instituisaun sira seluk, UNDP rekoñese katak iha nesesidade atu halibur dadus kuantitativu kona-ba kondisaun sosiál, ekonómika no polítika iha Timor-Leste ne'ebé halo diferença entre fetu no mane. Nia konsidera ida-ne'e hanesan forma ida ne'ebé bele fó informasaun baze ba UNDP no instituisaun sira seluk kona-ba kondisaun material ne'ebé nasaun ne'e iha no halo programa efetu hodi responde ba kestaun jéneru ninian. Iha 2006, UNDP publika nia Relatóriu kona-ba Dezenvolvimentu Umanu ba Timor-Leste, ne'ebé nia buka atu sukat dezenvolvimentu umanu nia dimensaun hasoru Objetivu Dezenvolvimentu Miléniu. Relatóriu ne'e fahe indikadór kona-ba dezenvolvimentu umanu tuir seksu, no nia inklui mós análize jéneru ninian kona-ba progresu dezenvolvimentu ninia disparidade entre fetu no mane.

Dezenvolvimentu Inter-Institucional

UNDP rekoñese katak maske nia kometimentu institucionál deklaradu ba igualdade jéneru nian, iha prátika jéneru la tama iha ajénsia ne'e nia servisu. Ida-ne'e akontese tanba fatór oin-oin, ne'ebé inklui kapasidade pesoál nian, rekursus no tanba laiha aprosimasaun sistemátiku ida kona-ba kestaun ne'e. Hanoin ba ne'e, hahú tinan 2005 to'o 2007 UNDP fó atensaun atu halo polítika jéneru ninian sai susesu iha instituisaun ne'e nia laran.

Ida-ne'e signifika katak halo servisu hamutuk ho membru tomak atu asegura katak sira iha kapasidade no vontade atu alkansa objetivu sira ne'ebé bazeia ba jéneru, iha sira-nia servisu-fatin, no atu asegura katak projetu sira halo no implementa tuir análise jéneru ninian. Ida-ne'e signifika mós katak dezenvolve aprosimasau, estratéjia no instrumentu ida ho sentidu atu pesoál projetu nian uza iha projetu nia dezenvolvimentu, no mós asegura orsamentu adekuaudu ba pozisaun pesoál sira ne'ebé dedikadu. UNDP iha mós kometimentu atu partisipa efektivamente iha *United Nations Consultative Group on Gender* (UNCGG ka Grupu Konsulta Nasoens Unidas kona-ba Jeneru) ne'ebé jéneru nia Focal Point sira husi Nasoens Unidas nia ajénsia sira no Banku Mundial hasoru malu.

Kontaktu

Tlp: (670 390) 331 3535
Fax: (670 390) 331 3534
Website: www.undp.east-timor.org
Alamat: UN Agency House, Estrada Caicoli, Caicoli, Dili

Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 69-71.